

Collazione AB - DEIK

AB	DEIK
I	I
Lanqan li jorn son lonc en mai m'es bels doutz chans d'auzels de loing, e qand me sui partitz de lai remembra-m d'un'amor de loing: vau de talan embroncs e clis, si que chans ni flors d'albespis no-m platz plus qe l'iverss gelatz.	Lanquan li jorn son lonc en mai m'es bel dous chans d'auzels de lonh, e quan me soi partitz de lai remembra-m d'un'amor de lonh: vauc de talan enbronc e clis, si que chanz ni flors d'albespis no-m platz plus que l'iverss gelatz.
II	II
Ja mais d'amor no-m gauzirai si no-m gau d'est'amor de loing: qe gensor ni meillor no-n sai vas nuilla part, ni pres ni loing. Tant es sos pretz verais e fis qe lai el renc dels Sarrazis fos ieu per lieis chaitius clamatz!	Ja mais d'amor no-m jauzirai si non gaug d'est'amor de lonh, que gensor ni meillor no-n sai vas nuilla part, ni pres ni lonh. Tant es sos pretz verais e fis que lai el renc dels Sarrazis fos ieu per leis caitius clamatz!
III	III
Iratz e gauzens m'en partrai qan veirai cest amor de loing, mas non sai coras la-m veirai car trop son nostras terras loing: assatz hi a portz e camis e per aisso no-n sui devis... Mas tot sia cum a Dieu platz!	Iratz e jauzens m'en partrai qan verai cest'amor de lonh que per un ben que m'en eschai n'ai dos mals si be-m soi de lonh. Ai, com fora dreitz pelegris si ja mos flox ni mos tapis fos per sos bels hueils remiratz.
IV	IV
Be-m parra jois qan li qerrai, per amor Dieu, l'alberc de loing, e s'a lieis platz, albegaraï pres de lieis, si be-m sui de loing. Adoncs parra-l parlamens fis qand drutz loindas er tant vezis c'ab bels digz gauzirai solatz.	Dieus que fes tot quant es e fai e formet est'amor de lonh, mi don poder qu'encor lai eu remir cest'amor de lonh veraiamen en tal aisis: si que la cambra e-l jardis mi semble maisos e palaitz.
V	V

Ben tenc lo Seignor per verai per q'eu veirai l'amor de loing; mas per un ben que m'en eschai n'ai dos mals, car tant m'es de loing. Ai! car me fos lai peleris si qe mos fustz e mos tapis fos pels sieus bels oills remiratz!	Be-m parra jois quan li querrai per amor Dieu l'alberc de lonh, e s'a lei platz alberguarai pres de lei si be-m soi de lonh. Adonx parra-l parlamenz fis quan drutz loindas er tan vezis ab bels digz jausira solatz.
VI	
Dieus, que fetz tot cant ve ni vai e formet cest'amor de loing, mi don poder, qe-l cor ieu n'ai, q'en breu veia l'amor de loing, veraiamen, en locs aizis, si que la cambra e-l jardis mi resembles totz temps palatz!	
VII	
Ver ditz qui m'apella lechai ni desiron d'amor de loing, car nuills autre jois tant no-m plai cum gauzimens d'amor de loing. Mas so q'eu vuoill m'es tant aïs, q'enaissi-m fadet mos pairis q'ieu ames e non fos amatz!	
VIII	
Mas so q'ieu vuoill m'es tant ahis. Totz sia mauditz lo pairis qe-m fadet q'ieu non fos amatz!	

- letto 1104 volte